

四庫全書

集部

欽定四庫全書

集部

忠肅集卷上

詳校官庶吉士臣陳若霖

侍讀臣孫球覆勘

總校官知縣臣繆琪

校對官中書臣李奎

謄錄監生臣張毓棟

欽定四庫全書

集部三

忠肅集

別集類二 宋

提要

臣等謹案忠肅集三卷宋傳察撰察字公晦
孟州濟源人年十八登進士第蔡京聞其名
將妻以女拒弗荅調青州司法叅軍厯遷吏
部員外郎宣和七年充接伴金國賀正旦使
時金人已起兵而宋人未之知察至玉田縣

韓城鎮使人不來居數日金數十騎馳入館
彊之東北行遇金大帥幹哩雅布迫令下拜察
抗辨不屈死之贈徽猷閣待制乾道中追謚
忠肅事蹟具宋史忠義傳集為其孫直煥章
閣伯壽所編周必大為之序察為堯俞從孫
學有原本史稱其文溫麗有體裁特年三十
七即邁國難以死未嘗有大著作以發揮其
才氣故集中所存大抵酬贈篇什及表箋啟

劉駢麗之作為多然其深厚爾雅亦自足資
諷誦且當宣和末造士大夫名節掃地之餘
一旦猝遭事變獨能奮身碎首致命成仁卓
然自遂其志其忠義之氣尤有不可磨滅者
詩文雖屬無多固當與李若水之忠愍集並
垂不朽矣乾隆四十五年三月恭校上

總纂官

臣

紀昀

臣

陸錫熊

臣

孫士毅

毅

總

校

官

臣

陸

費

墀

忠肅集原序

二帝三王時人才多出於國子蓋其見聞積習作成有素非如秀民必俟族黨州鄉賓興之然後用也觀舜命夔典樂教胄子曰直而溫寬而栗剛而無虐簡而無傲及命契爲司徒教民則敬敷五教在寬而已周官大司樂以樂德教國子曰中和祗庸孝友及司徒以三物教萬民則置禮樂於六德六行之後其視成材詳略次第固有別矣夫子不云乎興於詩立於禮成於樂學至於

樂則義精仁熟和順於道德而性成焉故以之事親必
孝事君必忠臨大節必不可奪文其餘力也晉唐以來
各學與監置祭酒若司業皆冠以國子亦古之遺意歟
本朝世臣巨室前後相望在仁宗時有若獻簡傅公諱
堯俞未冠以進士起家平居號稱長者及事四朝屢歷
言路忘身殉國有不可奪之節遭時遇主致位二府生
多美譽沒保令名遂爲大家其從孫忠肅公諱察年十
有八復踐世科宣和末以吏部郎假宗正廷勞金國賀

正使行及境上會幽燕交兵或勸其歸公不可猝遇幹
哩雅布強公使拜公又不可竟握節死之詔贈徽猷閣待
制乾道中追賜今謚其諸子皆以問學才猷翱翔仕途
至孫伯壽文采益高方以直煥章閣按刑畿部興念前
烈既編定獻簡公草堂集又哀公遺稿成三卷將傳布
四方屬必大序其首惟公文務體要辭約而理盡甚類
獻簡詩尤溫純該貫間次韻愈多而愈工惜乎享年纔
三十有七名宦未達高文大冊無自而發其淵源則可

考矣竊嘗論之獻簡幸生太平無事時止於正言不諱
是以爲宋良臣公則不幸將命艱難之際仗節死難遂
在忠臣之目要之忠孝大節易地則皆然特所遇不同
耳故爲推本帝王之教以及本朝之盛使學士大夫知
公世濟其美不隕其名者如此周必大序

欽定四庫全書

忠肅集卷上

宋 傅察 撰

詩

用廉夫韻招諸友登清微亭

東帶縛吏事發狂中憤興世情多面朋尊沓惡背憎緬
懷數君子皎皎瑩壺冰披雲見顏色洗翠露鋒稜忘形
到坦率高論破炎蒸藹然嘉譽在顧我獨無稱文場屢

交鎬師老畏侵凌况復時雨過綠苗覆千塍便當共臨
眺此興那可勝孤亭枕席佳下有寒潭澄仰看霞綺散
坐待月華升嘲詠縱歡謔明朝期再登

廉夫有會當歸去來之句復次前韻

少小尚奇偉長年病莫興折腰仕五斗詎敢論好憎居
然畏罪罟局如履春冰每懷鷹隼翮韝上看鋒稜追隨
縉紳後糠粃雜肴烝泮宮天下士藉甚得儒稱巍巍衆
峰上跛足豈易凌朝廷重薦延拔茅餘空媵公孫富經

術非子誰能勝坐見萬頃波
鬢垂汲汲逾澄沛然下膏澤
蒼若朝雲升勿云歎留滯青史他年登

次韻廉夫登清微亭二首

蝸舍不容膝煩歎局寢興豈惟倦束帶絺綌猶云憎清
微跨城角窳兀疑凝水深池暮黯黯遠岫朝稜稜往歲
與申子賓朋日雲蒸遂令棟宇陋顧盼流名稱先生今
詩伯氣欲青雲凌鏘然出佳句椒蘭布畦塍邀我避暑
遊意重愧難勝何當酌沆瀣神明自清澄嗟彼浮名者

此亭豈易升蹢躅恐後時攝衣請先登

大火氣方熾新金伏未興茅屋苦卑陋蘊毒空自憎流
汗常被體滌煩屢飲冰那堪青蠅輩鼓翅作威稜薰風
爍炎日沸鼎助薪蒸每思謀爽塏地隘舊無稱高亭枕
城隈粉堞勢騰凌清水繞其足茂林瞰田塍此間有異
趣躋攀弗能勝佳招適我願坐覺神魂澄何當卜鄰舍
與子朝夕升飄然忘世累長嘯效孫登

次韻祝康夫登南樓

膏雨潤四野草木蘇中乾駕言共臨眺凌雲陟層盤華
宇蔭曦日溽暑隨風闌清談無俗好茶果有餘歡撥置
簿領煩憇此簟席安悠然得佳趣可以寄簪冠耳目去
局促心體自廣胖何如歛手版觸熱事上官曉來纖靄
霽矯首欣遐觀一鳥沒天外千林杳雲端西山有爽氣
淺綠浮巔屹翻疑圖畫裏未覺雲夢寬蕭蕭林間蟬已
如咽暮寒直恐霜露至歸歟可忘餐

同七兄寄二李

昔我在淇水二陸皆少年伯也氣軒昂丹鶴唳青田李
方文章士摘華桃李妍力學乃未已有如火始然相見
一傾蓋便誦膠漆堅笑語玉塵折登臨蠟屐穿時時出
秀句洒若沈疴痊爾來踰十歲自當冠貂蟬胡爲茅屋
下寂寞尚草玄方今明堂構收拾棟與椽安得刷羽
翮吹噓送上天此志儻不遂何用空言傳不如李翰林
沉醉自稱仙不如陶彭澤歸來謝塵緣但解琴中趣何
妨甕傍眠富貴草頭露名譽空中烟子意竟何如余心

方寂然願求真實語莫作猾頭禪

夏日登清微亭

永日留煩暑斯樓得屢登向來知異境高處若無憑遠
岫生雲直輕風颭浪層試承金掌露更接玉壺水抵掌
賓朋盛題詩氣象增望窮遺憾在我欲醉時升

清微亭分韻得空字

縹緲千層外縈紆一徑通飛甍明落日巨棟掛斜虹賞
眺資公退招邀得調同九天開浩蕩萬象入牢籠水色

連晴碧雲容借晚空清乘庾公興快挹楚王風弁側金
疊倒樓昏畫角終明朝車馬客陡覺厭塵紅

大暑同蔣明亞叟熙載夜登清微亭

土潤伏新金陽歆困亭午曦御駐征驂朱光徹厚土烏
雀噪堦除蛙蚓鳴草莽簿領抗塵容茅簷庇環堵蜂蠆
亂繩床蚊蟲隱雷鼓攫拂徒爾爲青蠅敢予侮避喧空
百慮對食但三吐舉筯未搖風揮汗已成雨那能整冠
巾誰復對賓主豈惟眩生花坐覺氣如縷南方有高樓

兀然蔽華宇，摳衣倦躋攀。策杖愁偃僂，俄頃叩雲端。飄
蕭開洞府，新涼颭爾來。舊暑脫然愈，清池涌波瀾。踈星
穿牖戶，夜氣襲水霜。月明粲珪組，烏鵲倦還飛。遊魚清
可數，珍菓走金盤。清談揮玉麈，羣籟正囂囂。幽夢方栩栩，
何當食瓊漿。一夕生毛羽。

夜登清微亭，雲陰掩翳東北有。雨少頃，月出皎然。
復次前韻

融融暑未闌，悄悄夜方午。命駕聊叩門，尋幽得茲土。俯

矚但蒼茫前瞻何鹵莽萬籟正虛無羣生各安堵蟬噪
作笙簫蛙鳴當鍾鼓鳬鴈正參差詎諧懼狎侮豈惟冠
蓋傾已覺肝膽吐坐久隱奔雷天邊垂密雨疎木列賓
朋衆峰自臣主螢火落明星爐烟裊青縷那能勝酒杯
所欣瞻德宇高歌屢激昂失喜或俛倭蕭颺濯塵襟清
虛湛靈府快如仙爪爬洒若頭風愈須臾出金盤照曜
開玉戶映浪雜瓊瑰穿簾間壁組斯遊豈前謀後會難
逆數歡餘岸綸巾語約揮松塵可能伴雞棲亦復隨蝶

相廣寒會可升試爲刷翎羽

次晁之道韻

翰林詩百篇發興自斗酒同遊八仙中七者顏已厚通
來數百年斯人那復有風流城東晁四海蔚稱首之子
乃其豪異代得密友滿腹貯詩書妙意寓醪酎政使譽
日新位卑未爲醜亭亭澗底松不如園中柳芝菌冠衆
芳其出木枯朽叫閭問大鈞得致君側否

送承祖赴定州幕府

中山控北陲強弩號百萬單于銜國恩方且事逃遁謀
帥得真儒不煩一戰頓風流本江左疊疊有餘論幕府
極妙選參謀不容遜藉甚丞相孫凌雲氣豪健所懷社
稷計嘗願竊有獻蹭蹬三十年羈旅頗日困因人作遠
遊實亦垂素願談笑青油幕聊復可排悶嗟余謬從學
塵根苦遲鈍一官聯事久矜式每日勸但覺有不如未
見有進寸公亦不吾厭叩擊愧煩溷念當爲遠別悵然
亦多恨時方苦炎蒸行矣靳強飯

伯時往河東戲與廉夫分韻道相思之意三首

日月劇跳丸暫別亦已久青山繚層巔道里阻且右今
晨登南樓會此同志友思公聊北望竚立但搔首秋風
八月天霽色明朝牖軒車來何時遲爾一杯酒

朝氛霽西山晚日明髣髴遙憐太行山陟巘眩可畏王
侯眇小夫中盤凌雲氣端如車公賢談笑出真味胡爲
久崎嶇使我重歔歔王事有程期來歸懼其未

之子何磊落本是青雲才委翅蓬蒿下顰面垂髮鬢卜

鄰與我遊肝膽向人開酒酣遺世累謔浪絕嫌猜西風
換煩燠四野無纖埃方當共臨眺公兮胡不來

題毛彥謨容膝軒

夫子負異才端若會稽筭平生懷剛腸於世少許可文
詞類激昂議論耻媿媿高名三十年坐此常坎壈同時
英俊流往往步青瑣歸來樂簞瓢琳宮得安坐小軒僅
容膝陋巷生堀堞唯餘豪俠氣屢折每不挫却耽利名
場終身繫韁鎖生雖華屋居死或翳蓬顆固知宇宙間

所有終非我但當清吾心餘事等么麼

次七兄韻

蝸舍席爲門清風無所扇閒視纔半尋起行室百轉對
食不下喉流汗常被面矧復鳬驚行摘尾抱大卷余方
有公事汝輩宜罷遣賴此伯仲賢縱談逞雄辨時時雜
博奕豈不賢遊燕呼奴取其來據榻聊一戰初如兩軍
交整陣咸伺便俄頃鋒刃集解紛在一箭或喜而撫掌
或駭而色變或傍睨而審或當局而眩剝剝伐木聲離

離衆星現勝負既已分反奩若收電却尋文字觀觸物
本無戀覓句屢吟哦誦詩乍遊行百謫勿相聞從渠書
我殿

晚登清微亭次祝教授韻

雉堞亭亭倚翠微高樓裊裊弄清暉共邀嘉客扶筇杖
驟喜涼風振羽衣過雨山川顏色好投林鳥雀噪聲稀
月搖翠浪明珠碎雲滿金波破鏡飛雄辨琅琅如落屑
新詩句句似連璣自憐性僻耽幽寂却恨匆匆便賦歸

送朱熙載改官還鄉

陶唐名臣有朱虎揖遜夔夷尊文祖後來傑出漢雲孫
折檻當時誰敢侮煌煌聖代見斯人凜凜遺風振千古
乘牛不數魯家俠衣錦何妨買臣窶十年牢落困膠庠
五斗栖遲尚環堵唯余豪氣自不除傾蓋向人肝膽吐
忽然結束事征鞍軒軒喜色浮眉宇謂余倚門親久待
况復楓宸拜明主朝廷公卿重薦延鵞騰一鷄生毛羽
高義如君世所稀早據要路思裨補

芝堂

弘度負土忘晨夕空腸未忍進一溢伯會隆冬不衣帛
野火燎原天雨澤當時廬側產靈芝盛事至今光史冊
王家兄弟皆英豪藉藉聲華若連壁高文奧學乃餘事
一門躬行如萬石孝思他日徹蒼旻血淚垂頤灑枯栢
誰云草木但有生始信幽明本無隔煌煌三秀發坤祥
小大高低紫與白搢紳駭嘆絕前聞老稚提携溢阡陌
爭言圖寫獻修門坐見恩榮來絡繹公獨掩耳更悲帝

吾恐貨名於窀穸豈如採摘付兒童大勝贏金滿千鎰
方今孝治軼唐虞八行求賢當側席公雖韞匱畏人知
定有新詩振奇蹟

雪九首

都城十日雪庭戶浩已盈呼兒試輕掃留伴小窓明
天公亦戲人奇幻驚倏忽朝來簷雷間一一綴明月
晚風掃連氛客被憎夜峭明朝赴看燭更把崑山照
高堂連夜賞蛾眉映珠櫳誰憐閉門客衣穿履亦空

黑雲埋日車厚雪鎮坤軸行路勿匆匆包藏恐深谷
忽驚陋巷間踏作瓊瑤迹坐聞郢中歌妙句壓元白
春雷忽隱隱春雪復紛紛農夫戒及澤荷鋤已成雲
撒鹽乍可擬刻楮竟難成妍詞觀天巧應復召羣生
盈尺兆嘉祥三登賀時泰我雖無寸田一飯猶足賴
次韻杜無逸西園獨坐九絕句

南浦送微波西山來遠綠日暮獨盤旋慨焉撫孤竹
前輩不可見古道邈難尋何時赤松子相與歸山陰

折腰為五斗我已愧淵明共赴東林約悵然懷友生
虛齋篆爐烟兀然得禪寂雖有錦繡腸畫餅安可食
亭亭澗底松幹凌雪霜孤既無鸞鳳翔鳥雀來喧呼
一世競榮利紛若空中花蚤作田園計人生會有涯
身遊闌闌間心在孤雲杪譬如登太山頗覺天下小
外慕亦無已反身良有餘乘流如逝者韞匱豈藏諸
聖德覆天下歡然萬物春北窓微笑傲似是羲皇人

題張季良造性齋

揚雄家無甌石儲閉門作賦擬相如鄴侯揀架多異書
牙籤萬卷吞石渠吾友張子斯人徒嗜好酸醎與衆殊
被褐懷寶老不癯收拾萬卷以自娛但願生爲蠹書魚
咀嚼英華味道腴揮毫落紙驚羣儒佳處往往凌太虛
網羅秦漢包唐虞上下千載歸指呼自言此樂世所無
不羨潭潭卿相居方今清廟收璫璫肯使滄海遺明珠
高名他日播天衢行看旌帛來庭除

任伯仲時德升用均父韻送德父守蓄川邀余同

賦

妙齡擢秀如黃童藉甚詞林振古風
瀾翻千載常在口
磊落萬卷獨蟠胸不將龜筮論從逆
獨向詩書有高識
琳宮乞得十年閒可但新詩勝疇昔
一麾自詭治東萊
洗眼看公手重拭疲氓按堵身暫休
黠吏垂頭聲不出
人言功效真卓爾歸近高堂渾含喜
喜公才氣更難量
致君要著岩廊裏秋雲漠漠向空飛
颯颯涼風生桂枝
馬蹄又踏東川去盤水洋洋可樂飢
我今作吏愧無補

夢寐林泉那得歸會袖手版付丞相却掃庭闈戲練衣
卜鄰僅許依仁里與子艱難共生死釣竿伴我訪滄海
沮洳定無三尺鯉

送傅倅

沼之水兮其流舒舒公之來兮朱服熊車士元展驥仲
舉題輿公之來兮民斯樂胥沼之水兮其流洋洋公之
化兮春雨秋陽袴襦頌洽禾黍歲穰公之化兮民斯悅
康沼之水兮其流瀾瀾公之去兮旌旂旖旎父老攀轅

縉紳方軌公之去兮瞻望徙倚洺之水兮其流洩洩公
之德兮此邦所惻吏遵其畫人懷其惠公之德兮久而
勿替洺之水兮其流活活公之名兮茲其彌達翔於朝
宁騫於省闈公之名兮莫我敢遏

贈朱令中泮宮二首

折桂陪英彥彈冠接案僚志連秦璧固論鄙楚師忉迨
驥終難繫翔鸞詎可邀緬懷岩下士猶得夢中宵

異時師盛德此地喜同僚尺璧完無玷和鐘小不忉尊

疊傾笑語車馬費招邀莫使光陰度從今便卜宵
余父子妻孥各在一方欲歸未得因感成詩

皎皎明河漢悠悠度女牛奔馳空歲月南北尚淹留所
願各千里此身兼百憂如何有羽翼來往亦遨遊

思歸

舊國日已遠東秦安在哉水雲波浩蕩林日影摧頽野
色撩詩興秋風動旅懷繫舟還信步不覺詠歸來

阻風次衡元度韻

水柳纔孤舟飄飄萬里秋
遠風來不斷高浪去難收
菰葦蕭疎折烟雲慘淡浮
賴知師德在舟子亦多愁

逍遙堂五詠

欲識逍遙樂都忘利與名
討論唯百氏來往有諸卿
靜覺羊腸險間看蝸角爭
超然窮妙理知不愧莊生

堂上春風至欣欣草木情
鶯啼藏柳暗蝶舞映花明
暖日遲遲景輕雷隱隱聲
客來何所有采蕨試清烹

堂上薰風至陽曦午更驕
翫陰欣葉密引飲快冰消
乳

燕飛還墮鳴蟬咽復調清談能却暑應不費招邀

堂上西風至郊原歲事成雨餘虹影落雲霄露華清唧唧蛩鳴夜飄飄雁度晴登臨多物色筆落競縱橫

堂上寒風至蕭條靜物華映窓唯有竹倚檻更無花碧瓦霜初重銅壺日易斜樽罍延夜永不覺已朝霞

吏隱亭會集

招携共到習家池雲水為裳芰製衣魚戲輕舡浮枕簟鷗隨落日下汀磯岸巾已得杯中趣橫吹如從天外飛

野性每來應未厭驪駒寧復賦言歸

尉治吏隱亭二首

公餘吏隱荆新亭野閣雲低疊素屏風動荷香翻偃蓋
日搖波影散疎星望窮南畝千重綠坐久西山數點青
更待晚涼蟬亂噪與君散策試同聽

一番新雨洗華亭四面晴天倚翠屏並秀採蓮舒嫩臉
孤飛白鷺帶殘星披襟驟覺登仙樂倚檻猶疑倒影青
橫笛晚來聲更好龍吟泓下亦時聽

十五伯以詩見贈因次韻為謝

蕭然顏巷復誰堪
竟日潛心到五三
載酒未妨從靖節
圍碁端不羨羊曇
逢人傾倒羣兒笑
落筆縱橫四座慙
舊學青箱知未替
更將新律付諸男

次韻申泮宮直宿早秋四首

新秋爽氣溢長空
絃誦低昂月應櫳
濟濟青衿成魯變
洋洋泮水詠洙風
羣儒篆刻空章句
百氏紛紜賴折中
何日拔才空冀北
如今高譽滿山東

皎皎清波滿四空
疎林散影弄朦朧
援毫欲賦陽臺夢
振袂欣乘玉宇風
已覺素秋來席上
却疑仙景落壺中
凌雲未許攀仙桂
卧看冰輪沒漢東

一方明月落長空
萬里餘輝鑠玉櫳
蟬韻啾啾來遠木
槐雲裊裊弄清風
共邀載酒陶彭澤
走訪談經戴侍中
景物蕭然無限思
靚粧應許過牆東

泮宮深閉絳帷空
遙想佳人照綺櫳
閒倚畫屏憐永夜
懶搖紈扇引涼風
直疑令史歸天上
猶想陽臺入夢中

展轉覺來無一事日搖槐影桂窻東

又次申教授直宿三首

皎皎虛堂帶月清金風入律露華明潘郎遇直生秋興
韓子長歌憶短檠驚鵲遶枝巢未穩幽虫尋砌隱餘聲
却嫌詩思撩歸夢數盡高城長短更

擾擾浮名絆此身相逢樽酒眼還明君如俊鶻方搏翮
我似彎弓不受檠弱植幸容依玉樹新詩嘗喜擲金聲
他時會致青雲上莫厭卑棲歲屢更

秋堂襖被有餘清驟喜秋光潑眼明簾外月華篩碎玉
牀頭螢火當長檠直嫌唧唧秋虫響且聽琅琅絃誦聲
善教尙煩留滯席朝恩未許便歸更

同工曹至臨洛道中禾黍蔚然喜而作呈朱令

甘雨初勻歲事時冥冥造物本無私綠雲捲地薰風細
翠浪翻天曉露滋已見郊原深沒馬預欣場圃積如坻
從來令尹憂民切短句聊憑一解頤

方量牧地次韻工曹王亞叟

卷上
朝廷庶事備成康郡邑承風底事忙要使幅員無曠土
始知冀北有留良踈狂似我徒勞耳術業如君詎易量
奔走幸容陪笑語每觀醉墨屢琳琅

杜無逸留別次韻三首

薰蒸和氣決豐年羸老欣聞詔令宣疾惡如讎知勁節
清言有味樂推賢却嫌松菊荒三徑故乞絲綸下九天
欲識邦人思厚德四郊草木亦依然

汪汪萬頃浸清波千里旁漸惠澤多化比宋均方渡虎

瑞同黃霸自生禾盤根治劇觀游刃破膽投姦去宿疴
已有謳吟喧井邑更傳佳句似陰何

一官塞北似飄蓬邂逅威嚴霽弱翁它日若陪林下客
亦能把釣待秋風

無逸用前韻見謝復次韻

藉藉聲名自妙年優優惠化詠來宣寧誇衣錦先前牒
便擬揮金繼昔賢秀句屢同歌白雪高標猶幸視青天
自慚不得陪騶御空想餘風尚凜然

一麾聊復散餘波才比淮陰益辦多千里宣威瞻夏日
三年種德歛秋禾如綸忽聽頒新渥勿藥還欣已舊疴
却恐九重思治行蒲輪它日竟如何

鵬飛初不礙蒿蓬自擬歸休慕仲翁况有仙姿標洞府
冷然禦寇已乘風

和鮑守次韻林德祖十四首

南宮三日仕非輕湖海歸來一草亭譽襲芝蘭方冉冉
節高松栢獨青青仁風已播袁宏扇素尚行頒毛玠屏

豈待暮年歸報政人占此地有台星

莊周蝴蝶夢魂輕盤谷家山有舊亭下筆未能工婉白
折腰何敢望紆青思魚此日空彈鋏誤墨他年點畫屏
寂寞草玄繩戶閉猶堪歸伴少微星

五月黃塵去轉輕褰裳幾處宿郵亭共知向日輸心赤

公詩有報國身輕之句

莫嘆微霜點鬢青

公詩有白頭之嘆

每傍重霄求

寶劍欲令新木作枯屏

淮南子不逢仁惟此自幽谷之永為枯木

流傳賸有

風騷句遙想羣公若會星

恩分千里賞猶輕
好建精思李栢亭
日映水壺融皎潔
風臨玉樹發葱青
高名競慕蒲葵扇
雅操寧施刻鏤屏
夢得惠連春草句
虛傳李白是金星

氣蓋千人一羽輕
九霄丹鶴唳華亭
姓名已入金甌覆
留滯休嗟銀印青
彩筆挾天搗麗藻
高標挿地見長屏
鹽梅他日從人望
商說何功比列星

聖代勤民豈外輕
聲名今已播邊亭
風搖鈴閣終晨靜
雨鎖棠陰滿地青
賜表殊功宜冕服
榮分從吏亦緹屏

如公學問留閒郡東壁何人應二星

十年塵土坐才輕五斗猶堪佐縣亭
鼎貴敢歆新綬紫固窮唯有舊氈青
已甘終作輪囷木未忍翻同屈曲屏
猶喜膺門被容接常瞻郎位蔚然星

銀鈎落紙彩毫輕醉寫新詩入禁亭
學擅儒宗窮壺典文摛墨妙炳丹青
親承零露如金掌密蔽衝風似寶屏
雅意未湏嗟出守宵衣方念庶民星

九萬鵬程舉翮輕蚤年高譽滿江亭
曾分蘭省趨墀赤

行從荷囊拜瑣青雅度最宜錙玉佩精忠不用綠沉屏
欲令行部襜帷去要使人爭識景星

久嗟留滯歷叢輕桃李無言向野亭展驥始應流汗赤
登龍早見出藍青三餘共對賢人酒四野欣瞻別駕屏
何日蒲輪趨台節便看兩兩映魁星

半刺同流寄未輕勤勞每舍離鄉亭高懷不羨貂蟬貴
麗句還酬玉紫青字買千金休擇筆才兼三絕好書屏
獨慚後學波瀾狹明月舒空映小星

淮陰當日少年輕官舍渾如寄旅亭十載淒涼甘組綬
三冬諷誦伴燈青才非徐孺慚懸榻詔異陳咸豈觸屏
獨幸親逢陶謝手每觀一字並華星

佐縣三年敢意輕掾曹還許暫平亭齒延屢醉爭扶白
嗣響非工愧取青自此浮鷗容海浪幸同馴鹿傍車屏
從今已恐終更去悵望參商是別星

使軺問俗畫輪輕五馬張筵駐驛亭他日恩榮封詔紫
佇看蹇諤伏蒲青才能並賜龍文劍勲業同分雲母屏

太史已書賢者聚勾陳此地仰華星

沈和仲過郡鮑
欽止因留宴飲

七月二十五登舟

暫來征騎出閭闔却掉扁舟下小津
颯颯西風如送客蕭蕭晚雨欲留人
一年蹤跡無停日千里羈遊又遠親
為問篙師從此去定知幾日到東秦

野宿

沂水秋風揚小棹穿林落日繫孤舟
心清乍喜離囂俗野曠翻疑動旅愁
歸鴈高飛雲杳杳幽虫夜話草悠悠

此間景物君知否即是瀟湘一片秋

晚發

理棹頻看溪水分岸移不覺轉孤村
漁翁醉卧灘沙穩樵子行歌岸草昏
白鷺成行低欲落清蟬無數斷還聞
自將野色并秋色都付詩魂與醉魂

過灤次衡元度韻

山雲漠漠水溟溟千里拏舟似葉輕
乍喜晚光偏照耀却嫌秋色太分明
疑人鷗鳥看來熟端客荷花望處平

佳景直須乘興入蚤催風伯送吾行

再阻風次衡元度韻

阻風三日不舂糧浪急篙橫未到莊碧水賴知饒夜月
青山已復下殘陽每吟秋興空多淚欲賦西征細作行
行止定非臧氏力艱難險阻自須嘗

次韻烹茶四首

移種疑從紫府仙世間凡草護芊眠味高石蜜甘居下
效捷靈芝愧在前白絹並標官焙印月團猶帶御爐烟

年來海宇皆知愧却笑神農未解煎

劉夢得茶歌炎帝雖嘗未解煎

吏隱從人號懶仙一甌常及日高眠要令萬卷澆胸次

便覺三山到眼前客至不須樽有酒家貧肯厭突無烟

清泉近在南山麓珍味殊勝渭水煎

白樂天有渭水煎來始覺珍之句

不但蠲煩起醉仙能令古莽失多眠

見列子

春風乍拂千

巖上曉雨初沾百草前絳縷縫囊包紫壁

杜牧之詩芽香紫壁裁

玉塵凝盃照清烟

李郢詩有玉塵煎出照碧霞

今人嗤點前人拙未

肯須依古法煎

徐鉉任道詩新物須依古法煎

仰望羣公若會仙
貪論茗飲未安眠
冥搜徃徃遊塵外
得句時時在枕前
夜漏謳吟清徹骨
晴窓揮染淨無烟
中秋風月佳辰近
應把雲腴對竹煎

李衛公詩孤吟對竹煎

槐堂二首

懇勤當日植文槐
志在經綸世豈知
古栢空傳武侯廟
甘棠爭誦召公詩
顏顏共惜成陳迹
屢屋初欣啟舊規
豈但一時追盛事
高名從此看雙垂

鬱鬱庭柯已百年
相傳勿翦豈徒然
曾棲鸞鳳枝條聳

直傍雲霄雨露偏
彩制乍驚增昔構
佳名還喜契台
躔故知異日思
遺愛爭指新堂
說二賢

李良寵示牡丹長句謹賦三首

一見奇葩潑眼明
兩州風物寄爭新
十家京洛供長日
萬朵東秦照暮春
諦視尚疑傾國女
醉吟猶付謫仙人
定知不是無情物
為有真香暗度頻

僕家近洛陽而
嘗官青社故云

紫檀刻藥香初吐
紅粉勻葩色正新
孤艷長宜微帶雨
衆芳誰復與爭春
無端應恨風驚葉
不醉却疑花笑人

從此徑須連夜賞
遶闌百匝未為頻

如酥小雨壓芳塵
曲檻重來花更新
莫怪東風鍾異美
獨將仙種殿餘春
愧非阿母池邊客
喜見陽臺夢裏人
猶恨此生輸蛺蝶
偷香抱蕊往來頻

題毛彥謨容膝軒

蓴菜鱸魚意未踈
歸來端為憶吾廬
縱談衮衮皆忘倦
豪氣飄飄尚不除
賴有一經如長孺
休言四壁似相如
小窓宴坐無餘事
門外頻聽長者車

次毛彥謨韻

平生貴異不謀身率道恂恂范伯孫
巷有青衿來問道
家無赤脚可應門
抗章曾叩蒼龍闕
謹議終開白獸樽
見說晚聞多妙教
悠悠浮世更堪論

南溪會集

傳聞公退集羣英
共惜殘春到野亭
高柳半天成翠幄
遙峯插地作長屏
應憐曠寂囂塵絕
更覺蕭疎物象冷
顧我阻陪車馬客
空吟河畔草青青

淡蕩春溪帶晚城勝遊此地繼蘭亭風搖波面琉璃簾
雨洗山光翡翠屏舉酒莫辭歸酩酊垂綸聊復向清冷
曾須踏月重追賞要看林烟共罩青

次韻任伯仲父詩和唐英之什

數子聲華久絕塵更將詩律闢清新
爛如曉日鋪紅錦

穆若薰風泛綠蘋王謝由來多大手

誦任伯仲詩

何劉那得

比斯人

語均父

從今海內傳流徧在處常應護鬼神

九日次韻邢子友

側身西望涕沾翰黃菊丹萸又滿闌
偏揀定應憐我遠從遊誰復盡親歡
年過騎省悲秋易貧似司空乞酒難
何日故園鳴鴈侶醉歸松竹挂衣冠

司空圖九日詩黃菊新開乞酒難孟

浩然詩烟紅鋪藻翰松竹挂衣冠

贈毛彥謨二首

相逢晚歲莫情踈徑欲連牆卜並居
苦學美君詩有味固窮憐我食無餘
從容杯酒頻揮麈抖擻塵埃喜振裾
問道談言過輔嗣故應回首萬浮虛

歎息朝廷記憶疎未聞平子賦閒居窮經豈但論糟粕
樂道寧能逐腐餘已覺烟霞親几杖不教塵土汙簪裾
客來強起談名理寂寞茅齋盡日虛

馬上作

心逐輕波去身隨匹馬歸據鞍揮淚盡回首一依依

夢覺

日永不可過夜涼愁更多蟬聲嘶晚月孤枕夢如何

思家

一別遽如許歸期可奈何無心戀明月有淚寄流波

七月十一日夜涼風驟至即事書懷三絕句

涼颼此夕何佳哉萬里朱炎去不來吹入離人多少恨
却將魂夢到陽臺

蕭蕭初覺澹雲輕颼颼如聞轉樹聲收拾光輝渾在眼
應知騎省賦初成

窗外時聞一葉落槐陰驚起幾蟬鳴秋風定是多情物
解作離腸欲斷聲

七月十六夜對月

雲捲天高烏鵲飛滿庭槐影轉風枝可憐秋色誰分付

正是安仁作賦時

牡丹三首

侍中宅畔千餘朵興慶池邊四五枝何似城南王處士
滿園無數鬪新奇

無奈狂風日日催東君欲去復徘徊應緣衆卉羞相並
故遣妖姿最後開

半醉西施暈曉粧
天香一夜染衣裳
躊躇欲盡無窮意
筆法誰人繼趙昌

聞有游蔡氏園看牡丹詩戲作一絕呈季長

車騎雍容駐道傍
小園尋勝見花王
應知異日傳佳句
處處人稱黃四娘

海棠二首

清明後二日

恰恰清明昨夜過
海棠幽獨占春多
杜陵不是無心賦
才薄難工奈若何

欲識東君用意工故將殘葉襯輕紅
可憐雨洗胭脂濕
只怕風吹翠幄空

頌

擬請西封頌

肇自古初倅侗顓蒙上下靡記義農已降載籍所傳德
莫盛於五帝功莫盛於三王然皆封岱勒崇檢玉泥金
用能垂光於無窮逮至後世如漢與唐治未洽於羣黎
事已追於八九蓋未有符應昭明而罔舉升中之典者

也恭惟皇帝陛下席累葉之丕基紹唐虞之遙迹負宸垂
衣焦勞萬國於今十有四年矣挈紀綱於既全興典章
於已墜五禮明而八音諧四民安而九刑措和氣充塞
於海表惠澤漸濡於鬼區豐年協多稔之祥重譯盡鄉
風之俗靈芝嘉禾文石析木之異甘露醴泉景星翔鶴
之應紛紜雜遝史不絕書若乃神禹錫圭以告成上帝
歆德而來格則又非譜牒之所紀已昔周有素雉朱鳥
黑拒黃鶩之事漢有白麟赤鴈芝房寶鼎之歌猶能薦

之皇天以為元命校之二端何其褊歟間者近自留都東抵魯國西浹汾睢扶老携幼衆以萬計奔走闕下願講上儀章却而復上者屢矣皇帝方將儲神穆清守德謙固闕然數月未有俞旨意殆與所聞異乎於是三事大夫僉言而進曰陛下德臣五帝功君三王是宜建崇號施鴻名為萬世無疆之休茲事體大允其懿哉矧天地之錫枯垂鴻以積祐於我宋者不可以不答祖宗之垂統繼業以致治於今日者不可以不承乎陛下雖欲

辭之又可得邪皇帝乃瞿然改容沛然下詔曰惟天地
祖宗所以付畀余者余其敢怠有司其叅詳祥符故事
具注其儀朕將覽焉臣幸生斯時竊伏惟在昔太史公
自恨留滯不得從事於漢家之封司馬相如且死尙能
遺書道封禪事臣雖固陋久陶太平之化不勝惓惓盡
忠之義謹再拜稽首而獻頌曰於昭有宋受命於天聖
子神孫瓜瓞綿綿規重矩疊於億萬年天錫皇帝聰
明文武繼志揚功內登碩輔乃飭乃修舊章具舉禮樂

備興彛倫攸叙豐年穰穰零露涓涓嘉瑞紛紜披圖按譜應期紹聖如携如取瞻彼珍符匪珎匪璧非常之貺驗於載籍昔者帝堯四隩既宅經啟九道繼禹之績地平天成元圭是錫茫茫千世罔有弗欽鸞輿肅駕以即於南精裡昭格上帝是歆駕龍伏虎來享來臨旂旐颺舉式見冠衿凡在此列踊躍舞蹈和風洋洋披拂萬寓僉曰休哉天意可覩名臣顯位咸俟我后幅員西東請命奔走黃冠緇衣髻童鮐叟填衢載涂春糧裹糗願舉曠

儀以垂不朽皇帝曰嘻洛汝多士子臨有邦十有四祀
夙夜靡寧迄底於是兢兢業業罔或遺墜封巒告成盛
德之事顧惟德薄粵其敢議臣拜稽首薦貢封章追迹八
九前後相望皇皇我宋於古有光天命匪懈聿其可忘
帝曰俞哉迪惟累聖錫祐垂鴻受天明命予敢弗從以
爲民慶乃詔有司錯事展采祥符之儀典冊具在眷是
嵩高西狩靡逮儲精蓄靈意若有待令予祗事其始於
邁庶言既同羣公動色歷日協辰以詔萬國

表

擬請東封表

伏以承天之序孰先報本之方治世之隆必舉升中之禮蓋不特發祥受祉流福祚於無窮亦所以勒崇垂鴻示休烈於不朽皇皇哉天下之壯觀洋洋乎帝者之上儀遐觀古初歷選后辟固有無功而用事未聞至治而遺章粵我宋之龍興憲先靈而遠駕太宗順命以創制尙挈三神之歡真皇修德以錫符獨接千歲之統重熙

累洽用迄於今承明繼成宜若有待恭惟秉執聖德處
於法宮之中圖任賢才游於巖廊之上崇寬大而長和
睦務教化而省禁防四鄙晏安靡有兵革之事萬民和
樂長無繇役之勞修禮樂以文太平廣學校以揚俊異
外致殊俗內暢淳風囹圄空虛國無一人之獄衣食滋
植家有九年之儲澤浸昆蟲恩及行葦頌聲並作協氣
橫流三光全而寒暑平上順泰階之政五穀熟而草木
茂下均庶物之休垂拱無為衆祥自致精神所鄉嘉貺

薦臻百川理而絡脉通萬化成而瑞應著素雉朱鳥之
事比盛周家白麟赤鴈之歌參華漢室是以東土耆老魯
國諸生冀瞻穆穆之光咸慶顒顒之望況承天意以從
事固無進越之嫌儻垂聖慮於勒成允答神靈之眷伏
望皇帝陛下總集元命順攷前規採游童之歡謠悉五
縣之碩慮鳴鸞按鐸奏樂介丘檢玉泥金儲休岱嶽追
八九之遙迹章祖宗之盛功為萬世無疆之休寔千載
一時之會臣等不勝大願

擬代宰相已下賀藉田禮成表

治朝多慶熙事告成盛德先勞庶民胥慶況於在服罔
不均歡

中賀

竊以富國之源莫先於崇本導民之路尤

重於勸農然欲風流而令行固非家至而人說蓋上之
化下也如風之偃草則下之從上也若響之應聲廼於
東作之時示以躬耕之制非特昭國家之德化納於純
熙將以奉宗廟之粢盛盡其齋恪惟周自厲王以後廢
而不修故傳載號公之言詳而有證降及後世間有令

主屈萬乘於須臾垂四方於軌則載在信史猶振遺名
肆太宗端拱之初增華於令典逮仁祖明道之際順迪
於前彛用知稼穡之艱難終致倉廩之盈溢恭惟皇帝
陛下潤飾丕構粉澤皇猷省繇役以便民敬農桑之
上務罔游於逸配德於唐堯克勤於邦同符於夏禹申
舊章而下明詔歷吉日而協靈辰翠幕青氍旣舉先農
之制紺轅黛耜遂遵一撥之規誠意所加淳風遠暨去
未作而緣南畝致和氣而召豐年臣等獲綴近班親陪

盛事草藉田之賦雖無潘岳之才賡載芡之詩蓋見周
家之治其如欣頌實異等倫

代余帥賀南郊禮畢表

修精誠而備庶物既嚴享帝之容受福祐以浸黎民遂
沛自天之澤華夷共慶草木增榮

中賀

恭惟皇帝陛下

孝弟通於神明廣大同乎覆載頌聲並作協氣橫流式
講上儀聿修元祀欽翼祗栗內昭一德之誠盼嚮豐隆
上格三靈之貺載敷渙號大賚寰區臣夙奉宸恩屬分

藩服莫預駿奔之列空同率舞之情

代余帥賀冊皇后表

禮成宮闈慶浹寰區

中賀

竊以開睢為王化之基騶虞

美人倫之正自非懿德孰贊皇圖恭惟皇帝陛下道冠
百王功符五帝受祖宗之眷命得夷夏之歡心調陰陽
而和羣生既叶太平之治奉神明而理萬物益知內助
之賢日月增華天地順應臣生逢熙運獲睹盛儀雖馳
魏闕之心莫預彤庭之賀

代都憲賀冊皇后表

天作之合方隆治世之基王假有家爰正柔儀之位歡
聲所暨率土攸均

中賀

竊以太姒配周寔肇多男之慶

塗山翼夏允符受命之祥自昔明王必求懿德非特以
奉神靈之貺蓋將以輔天地之宜恭惟皇帝陛下齊家
以身治國以禮宣教化以親萬姓既資外輔之良擇令
淑以統六宮載舉內朝之政徽音寔嗣象服以宜臣幸
遇熙朝獲瞻盛禮屬遠持於使節莫預慶於明庭唯與

羣生永陶大化

代沈和仲賀冊皇太子禮畢表

歷日協辰載嚴寶冊承天貳體肇建東儲恩洽無垠慶

交有截

中賀

竊以作瑤山之樂式昭治世之功題銀榜

之宮爰正長男之位豈特繫國家之本蓋將守宗廟之
嚴彰哉甚盛之儀允矣難逢之會遠稽前志同夏啟周
成之美名近攷彌文著至道天禧之故事恭惟皇帝陛
下受三靈之眷命贊列聖之丕圖縣瓌流祥猗蘭襲慶

欲建不拔之策以展無窮之勲帝座分暉順前星之軌
道天池浹潤增少海之波瀾偉茲公器之尊介爾重離
之吉用敷渙號大賚寰區臣夙奉宸恩出將使指卜年
有永益瞻周室之隆獻壽無疆莫預漢庭之列傾葵竊
頌舞獸同歡

代沈和仲賀皇太子受冊表

位隆蒼震茂膺主器之良德配黃離允協重明之吉車
書所暨鼓舞惟均恭惟皇太子殿下岐嶷挺資溫文秉

質冠天枝而毓秀分璿萼以騰輝辨書牘之姦秉承乾
之德既協靈辰聿陳冠禮載隆國棟肇正皇儲出龍樓
而入虎闥仰日躋之盛德鋪金聲而光玉潤昭天縱之
多能固將蕪三善於姬文豈特陳五學於賈誼某幸遇
嘉會久玷明恩徒瞻鶴禁之嚴莫遂鳬趨之願永言善
頌寔倍常情

擬代宰相以下賀朱草表

協氣旁流紛若萬靈之貺頽莖叢出翹然百草之精見

聞所周欣躍惟一

中賀

自昔太平之世必膺可致之祥

金芝秀而嘉禾興紫脫華而佞枝植並標鉅美用紹殊
休若乃朱英之效靈尤為植物之罕見並攷前賢之對
謂至和上浹於陰陽載披往牒之言蓋盛德下漸於草
木誕彰丕應宜在明時恭惟皇帝陛下統攝羣元紹休
聖緒維葉泥泥既崇行葦之仁零露穰穰咸被蓼蕭之
澤相彼染絳之異昭茲炎火之珍葉開落以應期遠同
土堦之瑞枝扶踈而共榦近比水厓之生豈惟大太史

之書方且第從臣之頌臣親逢華旦預覩嘉祥黃閣調元莫補棟梁之用丹青拱北徒傾葵藿之思

代周文翰賀河清表

睿主有臨茂膺景福榮河薦瑞式契休辰事掩前聞慶交寰宇

中賀

臣聞百神受職者聖王之事五行布序者

治道之隆惟茲四瀆之尊寔處百川之首况大河之為害廼上世之所同合衆水以納汙激洪濤而引濁隄防弭患每泛溢之為虞牲幣祈禳豈澄清而可俟惟聖神

之在上宜天地之垂恩屢效珍符無逾今日恭惟皇帝
陛下堯仁舜知乾覆坤容治已格於神明祥自開於川
瀆大水既安於故道濁流還變於澄瀾寔聖德之所臻
非人力之可致詞臣歸美極賦頌之揄揚太史屢書增
簡編之煒煜臣叨居外服久荷殊恩阻獻壽於未央第
存心於魏闕

代沈和仲賀永橋成表

巨浸天開帶三山而中斷飛梁虹指亘萬世以彌堅凡

屬照臨率同忭躍

中賀

竊以水寔五行之本河為四瀆

之宗濫觴崑崙䟽壤積石灌注乎中國之半昭回乎清
漢之高鯨殪禹興施成功於三代周移秦決亡故道之
八支自時以來貽患如彼捷石蓄以禦水空傳瓠子之
歌下竹落以成隄僅塞館陶之口曾安流之莫覲豈長
慮之敢知國家柔河嶽之神盡溝洫之力聖人興而圖
書出五道修而洛胙通榮光朝浮澄瀾夕變造舟霜降
之後既濟於往來鼓楫雨集之時尚虞於覆溺矧朔方

之孔道當信使之交馳繫人謀之與能信天時之無事
夏圖上策允屬熙朝恭惟皇帝陛下神智獨觀大明旁
照稽先猷而繼志攬初議以折中萬鍾子來靄雲蒸而
雷動雙川股引嶽谷轉而山頽壑陵阜以初分回波濤
於久塞不愆於數惟斷乃成架鼃鼉而上躋巨蛇龍而
橫據凌修塗於磴道微一葦之後艱鎮寶勢於坤靈宜
百神之來護慶交有截利及無疆臣夙荷朝恩外將使
指遠長安之日阻瞻望於餘光賡時邁之詩敢形容於

盛德

擬代宰相以下謝賜郊祀慶成詩表

精意潛通上格神靈之貺英詞俯逮遠追雅頌之聲拜命

生輝循躬知愧

中謝

竊以禮莫嚴於享帝孝莫大於配天

三歲親祠遵百王之盛典諸侯助祭仰元后之休光恭惟

皇帝陛下酌道德之源淵游文章之林府修精神而備庶

物祇見郊禋受福祐以浸黎民大敷渙號眷羣工之咸在

嘉盛德之既陳遙求厥寧念前王之垂統監觀於下荷上

帝之遺休用示淵衷載頌麗藻倬彼形容之妙煥然經
緯之文玉振金聲言自調於韶濩星輝月潤衆咸仰其
光明臣等叨備近司獲陪元祀奏甘泉之賦雖無靡麗
之辭歌成命之詩已見緝熙之治豈期宸眷申錫雲章
歸詫為榮共喜堯言之布永歌無斁益知舜孝之隆

擬謝賜大晟樂府記并古鐘頌表

作樂崇德遠追三代之音肆筆成書下陋百王之制載
頒宸翰申飭使人俾預獲於榮觀用仰宣於睿旨

中謝

竊以自昔承平之治必頌雅頌之聲將易俗而移風故
審音而知政逮周秦散亡之後蓋歷世以無聞繇祖宗
積累以來至今日而後備恭惟皇帝陛下道由天縱學
本生知坐興百世之功獨運無方之智以身為度靡容
高下之差用律和聲遂協始終之序陰陽並應日月增
輝迨茲千載之傳自我一王之法爰即清閒之燕深明
述作之源煥若丹青倬同雲漢閱侈鉅衍不特為靡麗
之辭深潤溫純將以追典謨之訓豈期綏賚弗間孱愚

此蓋伏遇皇帝陛下盛德及人至仁與下寵夫近弼錫以英詞拜命鞠躬隱若咸池之奏開絨爛目恍同廣樂之歡

代周文翰謝賜大晟樂表

象成作樂用錫予於庶邦觀德鄉方將訓齊於多士事高往牒慶溢縣區

中謝

臣聞教藝於鄉寔前王之盛典

習舞於學亦治世之宏規故舜作樂以賜諸侯而周設官以教國子庶使遐邇之俗習知道義之歸恭惟皇帝

陛下盛德難名豐功莫擬闢土疆於萬里播聲教於百
蠻用律和聲究六經之妙旨以身為度考三代之遺音
孰窺述作之端曲盡情文之善乃分頒於侯服俾肄習
於儒官敕上國之工師訓多方之俊造欽承嘉惠聳耀
衆觀將易俗以移風因審音而知政臣敢不布宣德意
敕厲邦人損益更張於以識聖神之治鏗鏘節奏非徒
為歌舞之容

代鮑欽止謝永橋成德音表

河定民安亘飛虹之千丈德洋恩普頌泥鳳於三方嘉

與羣生同茲大慶

中謝

竊以拔山通道灑二渠以分流

造舟為梁跨三峰而作趾啟長途之無壅省經費之不
貲蓋歷世睥睨而罔知唯神者經營而未暇載圖盛業
宜屬昌辰恭惟皇帝陛下遠迹禹功盡循堯道聖智先
定僉謀允諧河久由於地中水方趨於潤下飛芻穀擊
笑漢武之負薪舉鍾肩摩樂周文之為沼僞功不日慮
事不愆昭然大任之故蹤宛若中渾之壯勢萬世永賴

坐觀千載之清四方攸同本自一人之慶尚念子來之
德咸繫襁至之勤蠲賦錄勞聖詭宥過置郵星下率土
嵩呼臣早辱睿恩恭承渙號屬拊簿領遠分竹使之符
願採夙謠繼上河清之頌

代謝翰林院三伏早出表

陽居大夏欣化日之舒長伏當蚤歸遂清時之逸樂戴
恩甚寵視蔭增羞中謝伏念臣猥以孱虛列於禁路論
思獻納空懷待旦之誠偃仰棲遲但惜分陰之逝豈繫

晏罷亟俾處休此蓋伏遇皇帝陛下昧爽臨朝光華撫
運務厚使臣之禮特推恕已之慈終夜以思尙無忘於
舊學晝辰而退敢自比於前修

代余帥謝傳宣撫問表

使節光華遠臨外服訓詞溫厚俯逮微軀

中謝

伏念臣

蚤以愚朽之才復蒙尊顯之位入參機政初乏異能出
撫藩條靡聞善狀方譴訶之是懼豈恩寵之誤加此蓋
伏遇皇帝陛下湯德克寬堯仁博施憐其簪履之舊不

以遐遺錫以綸綍之言用申睿旨隆天重地未知報國之方就日望雲空懷存闕之念

又

聖恩隆厚不忘疏逖之臣天語溫純特示眷存之意

中

謝

伏念臣蚤繇幸會獲遇休明薦誤宸知擢叅機政去

國未久每懷報主之忠奉職無聞空有愛民之志方期
擯斥敢意思憐此益伏遇皇帝陛下盛德包荒至仁念
舊同天地以覆載配日月以照臨申飭使人就宣詔旨

鴻私所被銘骨知榮縣力易疲殞身何及

代梁帥謝獎諭表

將命朔方曾乏涓埃之效疏恩中禁誤蒙綸綍之頒載

德無窮省躬知愧

中謝

臣智能甚薄政治蔑聞頃奉宸

恩出膺使事多捐厚幣廣集瓌材籍外府之贏餘佐上
都之營繕顧職分之當爾豈勞能之可稱敢冀睿慈俯
頒溫詔寵甚兼金之賜褒逾華袞之榮此蓋伏遇皇帝
陛下御衆克寬用人以禮務記功而忘過每勸善以使

能凡少著於微勞必曲形於獎訓臣敢不益堅素節增
激懦衷什襲珍藏莫稱恩私之異一心盡瘁益思報效
之勤

代少尹謝獄空獎諭表

佐天府之浩穰初乏微勞奉聖書之溫純遽叨睿渥

中

謝

伏念臣性資巽戛學術迂疎誤辱簡知荐更器使區
區自效慚竊位以素餐斷斷無能但因人而成事方唐
虞推好生之治而趙張著良吏之稱務教化而省禁防

人自重於犯法行寬大而禁苛暴物不陷於無辜豈特
囹圄之空虛固已奸邪之銷釋在於叢爾蔑有稱焉敢
謂至仁亦蒙善獎恩重丘山之賜褒逾黼黻之榮蔀屋
生輝汗顏有覲此蓋伏遇皇帝陛下匪瑕忘過錄善使
能視民如傷欲遂措於刑罰班賞無吝俾咸勸於事功
苟少效於涓埃必曲形於綸綍臣敢不仰遵聖訓俯激
愚衷勉以一心庶盡公家之利藏之什襲永為私室之
珍

代辭免尚書左丞表

卷上

學微術昧居懷不稱之羞德厚恩深載奉非常之選輒
輸誠懇荐瀆明威竊以地重中臺二丞實資於管轄道
尊元首庶政咸賴於股肱矧上聖之端臨俾下民之底
乂宅乃事而宅乃牧率和衆俊之圖簡厥身而簡厥良
克懋羣工之叙必具瞻之攸屬豈積久以致升伏念臣
名在闕冗之中身遭明盛之世當陳力就列極懷翼翼
之心幸䟽舉廣謀爰納斷斷之介顧易窮之末技終莫

望於清光曠日累年曾莫施於片善循名覈實敢復冒
於次遷伏望皇帝陛下繹以庶言包之大度深察籲天
之懇收還渙汗之私勸百僚而顯有功肆疇咨於在位
展四體而率舊職尚勉及於前修如此則國無誤寵之
尤豈特於臣免貪榮之謗

代尚書左丞謝表

中臺貳政微勞勿效於明時左轄圖賢誤選乃容於充
位莫遂固辭之懇彌增非據之慚

中謝

竊以漢置四丞

實佐令僕之事唐分六部尤嚴綱紀之司然而進靡預
於國鈞故其任止專於樞憲粵惟神考稽古治官肇新
二府之聯允洽八元之舉蓋將偕衡旦臯夔之密勿豈
特同蕭曹丙魏之謀謨凡膺眷注之隆必傾衆望矧在
褒升之典豈曰喬遷伏念臣學不足以窮六藝之文識
不足以通萬方之略驟蒙異渥拔自稠人叨居侍從之
流間嘗論天下之大利玷處承弼之重每欲報人主之
至恩屬上聖之日躋方羣賢之星拱裁成輔相天且弗

違省節蠲除民用丕變醇法熙豐之治崇起教化之功
雖淺智褊能豈測神心之經緯而比善戮力粗知休命
之對揚薦深歲月之淹居積淵冰之懼免於罪戾已推
大度之仁奉以周旋曷副疇咨之意此蓋伏遇皇帝陛
下廣覽兼聽而盡百王之美翕受敷施而致庶績之凝
平章以堯帝之聰明左右以文王之陟降謂灼知厥若
孰先已試之求故申命用休益懋同寅之助肆令朽質
猥被寵光臣敢不激昂千載之期罄竭萬分之補宣中

庸之常政俾延及於羣生詠太平之清風與有辭於永
世乃所願也非曰能之

代都憲謝淮南運使表

備員無補已負殊恩錫命過優復叨劇任揆材弗稱省
分知榮

中謝

伏念臣家世寒微性資巽懦蚤繇射策濫

綴官聯幸遇時明荐膺器使未有涓埃之效自投鈇鉞
之誅犬馬微生分已甘於永棄乾坤普施恩猶許其自
新俾脫刑書復將使指孤忠自誓雖盡瘁以從公繇力

易疲空懷憂而內抱方將丐歸於農畝庶幾獲終於天
年豈意睿私尚加舉拔况茲淮甸寔邇王畿顧轉漕皆
通無一粒之不運致兵民咸足有九年之所儲在於臣
愚何以堪此此蓋伏遇皇帝陛下廣日月之照推父母
之慈勞於求賢靡擇行能之備醲於用賞不忘衰朽之
餘臣敢不祇奉詔條勉循職守雲天在望常懷存闕之
心溝壑未填敢後報君之義

代尚書左丞謝轉官表

擒方賊

折衝壓難曾微可紀之功舍爵策勲忽冒踰涯之寵遂
巡周極跼蹐增羞

中謝

伏念臣俗系單平性資異與少

而好學但勤糟粕之餘長則倦遊靡識經綸之旨徒以
遭休明之盛世委賤陋之微軀浸蒙特達之知欣遇俊
賢之后規事建議無補於萬分懷誠秉忠粗堅於一節
久負素餐之愧敢希苟得之榮屬茲狂童干我大戮方
整貔貅之旅遂空蛇豕之羣豈惟被草木以宣威固已
包干戈而偃武蓋聖神默運獨觀乎萬化之源而將相

協謀決勝乎千里之外在於最爾蔑有稱焉豈期慶賜
之行亦預褒陞之列此蓋伏遇皇帝陛下齊天地之覆
載配日月之照臨常公聽而並觀務稱物而平施謂職
分網轄雖莫總於兵謀然寄重機衡寔與同於妙筭故
賞疑而從子將悅使以忘勞臣敢不仰體睿私俯殫夙
夜會四海於一堂之上庶遵長治之規輔明主於三代
之隆益厲同寅之義

代閻彥昇謝轉官表

省漕失職宜寘嚴刑宸眷包荒祇從貶秩驚魂來復涕泗橫流伏念臣遇事無通敏之能守已有專官之累擢從冗散浸冒使令未聞毫髮之功徒積丘山之罪頃參民部荐歷歲華適當異議之從妄意已成之令蠹聲並起欲乘間以紛更雷同相從咸觀利而罔義臣以孑然之力忘其蕞爾之軀引義甚明竭忠靡避凡章奏之上二十有餘條至辨論之繁再三而後止獨是衙門之說迫於簿領之迷雖匪朋邪曾微糾正益愚既殫於千慮

而智終昧於三思分甘贖髦之誅敢冀寬矜之典此蓋
伏遇皇帝陛下光宅天下丕冒海隅釀於用賞而約於
用刑記人之功而忘人之過察臣區區自效非苟合以
取容憐臣斷斷無它遽疏恩而屈法仰戴乾坤之大益
知日月之明臣敢不深省前非愈堅素守拉朽磨鈍儻
來效之可圖粉骨捐軀豈天恩之能報

代鮑欽止謝降官表

奉職不稱至有煩言明詔加恩纔從貶秩捫心內訟顧

影增羞伏念臣蚤誤宸知嘗蒙器使智謀淺短雖公爾
忘私功敘陵夷故動而得謗間由罪籍復齒郎曹假攝
去來或暫司於銓綜捷杕姦冒終有愧於詳明迨茲貶謫
之餘猶負曠瘼之責分甘訶譴敢意寬矜此葢伏遇皇
帝陛下大覆堯天廣開湯網信賞必罰既激濁而揚清
布德施仁每赦過而宥罪曲憐寒蹇未忍棄捐自詭治
民倘尚能於寡悔庶幾晚節初論報於洪私斯言不渝
沒齒無怨

代發運使謝賜金帶表

總一方之轉漕方愧非宜錫三品之服章遽叨異數拜
恩而僂顧影增羞

中謝

伏念臣性異良金家無全布佩

韋以戒每師前哲之規束帶而朝會之當官之譽稍從
冗散獲預使令推食解衣盡出聖神之眷紆龜襲紫非
緣門戶之私常懼曠瘼敢迓譏議豈意非常之寵驟加
至陋之軀此蓋伏遇皇帝陛下約束羣才章明庶士寬
以御衆故靡間於微勞賞以勸功遂申加於三錫得子

衣之安吉增使臣之光華施厚身輕才微責重臣敢不
書紳自念歛衽知榮正其衣冠益謹不驕之誠副是腰
腹庶幾爲善之言

代外任謝日厯表

君子治厯明時式謹正王之度太史守典奉法虔遵月
令之文乃錫新編用循故事

中謝

臣聞順帝則者聖人

之德授民事者王道之原克咨羲和以釐百工舜用璣
衡以齊七政皆推明於象數以召致於休祥恭惟皇帝

陛下睿智通於神明廣大同乎覆載風雨時若固無謬
戾於陰陽舟車所通孰不奉承於正朔考天地四時之
極會日月五星之辰著為成書頒之外服臣敢不布宣
於上德用以訓戒於邦人春斂秋耕重識務農之義夙
興夜寐益存愛日之心

代謝生日禮物表

王綸載錫俯矜顧復之初臺餽有加曲示眷私之渥覲
顏罔措感涕奚勝

中謝

伏念臣奮迹孤年逢辰休顯修

身謹行居懷欲報之心憂國忘家更屬可移之義浸冒
網維之選密參帷幄之謀雖淺智褊能莫效三年之績
而隆恩博施尚收一日之長逮茲生育之辰方抱劬勞
之感豈期異數存軫淵衷此葢伏遇皇帝陛下恕以及
人醲於用賞未賜空餐之責每垂推食之仁靡瞻靡依
寧復甘旨之奉既醉既飽願殫夙夜之勤

又代謝生日禮物表

使華倏降仰奉明綸臺餽旅陳俯光初度拜嘉有覩攬

涕笑從

中謝

伏念臣生奮寒鄉出逢盛旦用過其量每
虞覆餗之羞食浮於人詎免伐檀之刺薦冒持綱之寄
居纏陟岵之悲移孝事君雖勉承於殊遇竭忠奉國會
莫效於遠謀敢期載育之辰猶軫至仁之念此蓋伏遇
皇帝陛下道均覆載禮洽臣鄰常推善貸之心務滿屬
厭之腹痛深創鉅豈知食稻之甘德厚恩隆尚喜嘗羹
之遺

又代謝生日禮物表

隆恩所逮增賁初辰厚意是將肆頒異數拜嘉甚寵撫

質奚堪

中謝

伏念臣族愧華腴才非秀穎蚤悟簞瓢之

樂晚叨廩餼之優父教之忠已後劬勞之報母取其愛
尚伸孝養之榮粵陪機務之繁居閱歲華之積罪固多
矣方懷覆餗之虞德莫厚焉每喜嘗羹之遺此葢伏遇
皇帝陛下禮備養賢仁先育物必申加於飮德將諉責
其遠謀馨爾膳而縈爾羞况仰承於錫類醉以酒而飽
以德願俯鑒於屬厭

又代謝生日禮物表


間史書時永念設弘之始饗官致餽欽承出綈之頒焜
耀有加凌兢失措

中謝

伏念臣生而固陋少也賤貧挾

策讀書雖靡同於學禮居官任職寔皆本於教忠會逢
上聖之臨起預衆賢之列陳謨無取空慚碌碌之稱守
節不渝但識尊尊之義敢意匪頒之典猶形慰謝之言
此蓋伏遇皇帝陛下覆育羣生恩憐近弼禮厚千鍾之
賜褒踰一字之榮祿弗逮親已負終天之恨身惟許國

益堅皦日之誠



忠肅集卷上